

Na osnovu člana 22. Statuta Brčko distrikta Bosne i Hercegovine-prečišćeni tekst („Službeni glasnik Brčko distrikta BiH” broj: 2/10), Skupština Brčko distrikta Bosne i Hercegovine, na _____ sjednici održanoj dana _____, usvaja

ZAKON O MLADIMA BRČKO DISTRIKTA BOSNE I HERCEGOVINE

DIO PRVI - OPĆE ODREDBE

Član 1. (Predmet)

Ovim zakonom se propisuju prava i obaveze mladih, omladinsko organizovanje, briga za mlade, institucionalno učešće mladih u donošenju odluka i druga pitanja od interesa za život, položaj i djelovanje mladih u Brčko distriktu Bosne i Hercegovine (u daljem tekstu: Distrikt).

Član 2. (Definicije)

Pojedini izrazi upotrijebljeni u ovom zakonu imaju sljedeće značenje:

- a) „omladina ili mladi“ su lica od 15 do navršениh 30 godina;
- b) „omladinski rad“ podrazumijeva oblike društveno korisnog rada iz oblasti interesovanja omladine u koji su uključeni i kojim se doprinosi unapređenju položaja mladih;
- c) „omladinski radnik“ je osoba koja radi sa mladim ljudima na načine neformalnog i formalnog sadržaja, fokusirajući se na lični i društveni razvoj kroz odnos jedan na jedan i grupne aktivnosti;
- d) „rad sa mladima” je planirana, svrsishodna i svjesna potpora mladima kroz njihovo dobrovoljno sudjelovanje;
- e) „omladinske manifestacije“ su oblici omladinskih aktivnosti u kojima se realizuju programi namjenjeni mladima;
- f) "neformalno obrazovanje mladih" je skup organizovanih i mladima prilagođenih obrazovnih aktivnosti, koje nisu predviđene sistemom formalnog obrazovanja, zasnovanih na potrebama i interesovanjima mladih, principima dobrovoljnog i aktivnog učešća mladih u procesu učenja i promociji demokratskih vrijednosti, kroz koje mladi stiču kompetencije neophodne za razvoj ličnih potencijala, aktivno učešće u društvu i bolju zaposlenost.

Član 3.
(Cilj zakona)

Cilj zakona je stvaranje uslova za institucionalnu i sistemsku brigu o mladima, način omladinskog organizovanja i društvenog djelovanja, učešće mladih u donošenju odluka koje se odnose na mlade i zastupanje interesa i prava mladih.

DIO DRUGI – GLAVNI DIO
POGLAVLJE I – OMLADINSKO ORGANIZOVANJE

Član 4.
(Omladinsko organizovanje)

Omladinsko organizovanje u Distriktu temelji se na poštovanju osnovnih ljudskih prava i sloboda, kao i izvornih načela demokratije zasnovanih na Ustavu Bosne i Hercegovine (u daljem tekstu: Ustav), Statutu Brčko distrikta Bosne i Hercegovine (u daljem tekstu: Statut) i međunarodnim konvencijama iz oblasti omladinskih djelatnosti.

Član 5.
(Ciljevi omladinskog organizovanja)

Ciljevi omladinskog organizovanja su:

- a) podsticanje sistematskog unapređenja i razvoja omladinskog organizovanja i omladinske politike uz aktivno učešće mladih;
- b) animiranje mladih;
- c) afirmacija omladinskih aktivnosti;
- d) zastupanje interesa i prava mladih;
- e) promocija učešća mladih u procesu odlučivanja.

POGLAVLJE II - PRAVA I OBAVEZE MLADIH

Član 6.
(Prava mladih)

(1) Mladi imaju pravo na podršku i unapređivanje svog razvoja bez diskriminacije po bilo kom osnovu.

(2) Ostvarivanje prava iz stava (1) ovog člana vrši se:

- a) unapređenjem individualnog i socijalnog razvoj mladih i sprečavanju njihovog mogućeg zapostavljanja;
- b) provođenjem politika kojima se djeluje na negativne trendove po mlade;
- c) održavanjem i stvaranjem pozitivnih životnih uslova za mlade, kao i okruženja koje je ugodno za mlade;

d) zaštitom mladih od opasnosti karakterističnih za njihovu dob, a kojima mogu biti izloženi.

(3) U radu sa mladima postupa se u skladu sa Ustavom, zakonom, međunarodnim poveljama i konvencijama koje se tiču prava mladih i ljudskih prava.

Član 7. (Obaveze mladih)

U skladu s ovim zakonom mladi imaju obavezu da:

- a) aktivno djeluju na jačanju svojih sposobnosti, na svom obrazovanju te na razvoju integriteta vlastite ličnosti;
- b) aktivno doprinose izgradnji i njegovanju društvenih vrijednosti te razvoju svoje zajednice;
- c) poštuju i zagovaraju vrijednosti mira i tolerancije u komunikaciji sa svim ljudima i ne diskriminišu ih po bilo kom osnovu;
- d) izražavaju solidarnost i posebnu brigu prema mlađim i starijim licima, licima sa posebnim potrebama, pripadnicima nacionalnih manjina, marginalizovanim grupama i pojedincima, pripadnicima konstitutivnih naroda i ostalih koji predstavljaju manjinu u lokalnoj zajednici gdje žive i rade te prema drugim licima koja imaju potrebu za solidarnošću i razumijevanjem od svojih sugrađana/ki;
- e) unapređuju sredinu u kojoj žive.

POGLAVLJE III - OMLADINSKE ORGANIZACIJE

Član 8. (Omladinska organizacija)

- (1) Omladinska organizacija je organizacija registrovana kao udruženje u skladu sa Zakonom o udruženjima i fondacijama Brčko distrikta Bosne i Hercegovine (u daljem tekstu: Zakon o udruženjima).
- (2) Mladi čine najmanje dvije trećine članova omladinskih organizacija i članova organa upravljanja omladinskih organizacija.
- (3) Aktivnosti i statutarne djelatnosti omladinskih organizacija usmjerene su na mlade i na volonterskoj su osnovi.
- (4) Omladinska organizacija je neprofitabilna i apolitična organizacija.

Član 9. (Udruživanje)

Omladinske organizacije udružuju se na različitim principima kao što su: strukovni, interesni i drugi, u skladu sa zakonom.

Član 10.
(Javnost rada)

Rad omladinskih organizacija je javan.

Član 11.
(Samostalnost u radu)

- (1) Omladinska organizacija samostalno utvrđuje svoje ciljeve i djelatnost u skladu sa Ustavom, Statutom i zakonom.
- (2) Aktivnost omladinske organizacije ne može biti u suprotnosti sa ustavnim poretkom, niti usmjerena na podiranje ustavnog poretka, raspirivanje nacionalne, rasne, vjerske i polne diskriminacije.
- (3) Omladinska organizacija ne može se uključivati, niti angažovati u predizbornoj kampanji političkih partija i neovisnih kandidata, niti im pružati podršku.

Član 12.
(Obezbjedenje sigurnosti i zaštite prava i sloboda)

Omladinska organizacija prilikom realizacije svojih programa i aktivnosti dužna je obezbijediti sigurnost i zaštitu prava i sloboda svim članovima i korisnicima, u skladu sa zakonom.

Član 13.
(Prava omladinskih organizacija)

Omladinske organizacije i njihovi članovi imaju pravo na:

- a) slobodu mišljenja i društvenog djelovanja;
- b) uključivanje u rad i aktivnosti organa vlasti, institucija i ustanova na svim nivoima i donošenje odluka bitnih za razvoj omladinske politike;
- c) javno iznošenje stavova i kritiku rada i djelovanja svih segmenata društvene zajednice;
- d) izdavanje svojih glasila.

Član 14.
(Obaveze omladinskih organizacija)

- (1) Obaveze omladinskih organizacija odnose se na konkretne aktivnosti:
 - a) omladinski rad;
 - b) afirmaciju omladinskog volonterizma;
 - c) organizaciju humanitarnih akcija sa ciljem opštedruštvene koristi;
 - d) organizovanje sportskih manifestacija;
 - e) borbu protiv bolesti zavisnosti;
 - f) resocijalizirajuće aktivnosti u oblasti maloljetničke delikvencije;
 - g) druge aktivnosti koje su od koristi za širu društvenu zajednicu;
 - h) neformalno obrazovanje mladih.
- (2) Omladinske organizacije imaju obavezu čuvanja poslovne dokumentacije pet godina.

Član 15.
(Ostvarivanje prava)

Omladinska organizacija ostvaruje svoja prava i obaveze u međunarodnoj omladinskoj saradnji samostalno ili putem Vijeća mladih Brčko distrikta BiH (u daljem tekstu: Vijeće mladih), mreža omladinskih organizacij, kao i mreža međunarodnih omladinskih organizacija.

POGLAVLJE IV –POLITIKA PREMA MLADIMA I STRATEGIJA ZA MLADE

Član 16.
(Politika prema mladima)

Politika prema mladima predstavlja ukupnost svih mjera i institucionalnih mehanizama brige vlasti prema mladima, koji su usmjereni na poboljšanje i unapređenje položaja i statusa mladih.

Član 17.
(Briga o mladima)

- (1) Briga o mladima je od opšteg interesa za Distrikt.
- (2) Briga o mladima se ostvaruje:
 - a) uređivanjem i stvaranjem uslova za omladinsko organizovanje;
 - b) donošenjem i realizacijom Strategije za mlade.

Član 18.
(Strategija za mlade)

- (1) Strategija za mlade je dokument sa programskim pristupom djelovanja prema mladima što uključuje definisane probleme i potrebe mladih, strateške pravce djelovanja, ciljeve strategije i mjere za realizaciju ciljeva strategije.
- (2) Strategija za mlade se izrađuje na osnovu istraživanja o potrebama i problemima mladih.
- (3) Strategija za mlade sadrži programe djelovanja za mlade u oblastima iz člana 20. ovog zakona.
- (4) Strategiju za mlade izrađuje Odjeljenje za stručne i administrativne poslove (u daljem tekstu: Odjeljenje) u saradnji sa Vijećem mladih i dostavlja Vladi Brčko distrikta Bosne i Hercegovine (u daljem tekstu: Vlada) na razmatranje i odobravanje.
- (5) Vlada odobrava predloženu Strategiju za mlade i dostavlja je Skupštini Brčko distrikta Bosne i Hercegovine (u daljem tekstu: Skupština) na razmatranje i usvajanje.
- (6) Skupština usvaja Strategiju za mlade na prijedlog Vlade za period od pet godina.

POGLAVLJE V – PROGRAMI DJELOVANJA ZA MLADE

Član 19.
(Programi djelovanja za mlade)

- (1) Realizacija Strategije za mlade ostvaruje se kroz programe djelovanja za mlade koji se donose svake godine.
- (2) Programi djelovanja za mlade predstavljaju plan provođenja mjera koje su definisane Strategijom za mlade.

(3) Programe djelovanja za mlade izrađuju nadležna odjeljenja i institucije u saradnji sa Vijećem mladih.

(4) Programe djelovanja za mlade donosi Vlada, na prijedlog nadležnog odjeljenja i institucije

Član 20.

(Sadržaj programa djelovanja za mlade)

Programom djelovanja za mlade posebno se definišu:

- a) zadaci i mjere za realizaciju Strategije za mlade po oblastima;
- b) opšti, materijalni, kadrovski, prostorni i drugi uslovi za njihovo ostvarivanje;
- c) tijela nadležna za realizaciju programa Strategije za mlade;
- d) podrška radu omladinskih organizacija i institucija koje se bave razvojem politike prema mladima, na osnovu utvrđenih kriterija;
- e) saradnja sa omladinskim organizacijama;
- f) izvršioci programa, način njihovog izbora i rokovi za realizaciju;
- g) unapređenje stručnog i istraživačko-razvojnog rada, informacionih sistema i informisanja;
- h) podršku omladinskim projektima i manifestacijama;
- i) međunarodna omladinska saradnja;
- j) omladinski rad;
- k) neformalno obrazovanje mladih;
- l) vrijeme za koje se donose programi.

Član 21.

(Oblasti za izradu programa)

Nadležni organi, institucije i druga pravna lica, u saradnji sa Vijećem mladih izrađuju i realizuju programe u oblasti:

- a) zapošljavanja, sačinjavanjem programa protiv nezaposlenosti mladih i pružanjem podrške organizovanju i aktivnostima, odnosno radu omladinskih organizacija, posebno onih koje se bave hendikepiranim mladim ljudima;
- b) zdravlja mladih, i to:
 - 1) kroz organizovano pripremanje i razvijanje konsultacije među omladinskim organizacijama i izabranim predstavnicima, socijalnim i profesionalnim grupama, koje se bave socijalnom zaštitom i promovisanjem zdravlja, kao i pripremanjem, razvijanjem i promovisanjem savjetovanja i informisanja mladih socijalnih radnika i dobrovoljaca, koji pripremaju preventivne i rehabilitacione strategije;
 - 2) borbu protiv zloupotrebe droge i alkohola među mladim ljudima, kroz saradnju sa omladinskim organizacijama, pripremanjem, razvijanjem i promovisanjem programa o problemima;
- c) obrazovanja, stručnim radom i usavršavanjem u okviru svojih nadležnosti ostvarivanjem opšteg interesa u oblasti školstva, promovišući neformalno obrazovanje, obrazovanje u oblasti ljudskih prava i ohrabrivanje mladih ljudi da ostvaruju puno učešće u školskom životu i srodnim aktivnostima, kao što su vannastavne aktivnosti i razmjena učenika;
- d) sporta i kulture, pripremanjem programa u oblasti sporta i kulture, s ciljem što masovnijeg uključivanja mladih u sportski i kulturni život Distrikta;
- e) sve druge oblasti koje se tiču aktivnosti mladih a nisu prije navedene.

Član 22.
(Nadležnosti Odjeljenja)

- (1) Odjeljenje u saradnji sa nadležnim organima i institucijama, i drugim pravnim licima:
- a) uspostavlja stručno radno tijelo za ažuriranje i praćenje provođenja Strategije za mlade u čijem radu učestvuju predstavnici Vijeća mladih;
 - b) obezbjeđuje istraživanje ili podršku istraživanju u cilju donošenja Strategije za mlade;
 - c) pruža podršku radu Vijeću mladih.
- (2) Stručno radno tijelo iz stava (1) tačka a) ovog člana imenuje šef Odjeljenja.

Član 23.
(Registar omladinskih organizacija)

- (1) Odjeljenje uspostavlja Registar omladinskih organizacija (u daljem tekstu: registar).
- (2) Omladinske organizacije upisane u registar predlažu projekte za mlade.
- (3) U registar se upisuje : naziv omladinske organizacije, sjedište, broj telefona, datum osnivanja, podaci o licu ovlašćenom za zastupanje, lista osnivača, broj rješenja o upisu u sudski registar, jedinstveni identifikacioni broj i dr.
- (4) Kriteriji za upis u registar utvrđuju se odlukom koju donosi šef Odjeljenja.

Član 24.
(Postupak za upis u registar i brisanje iz registra)

- (1) Postupak za upis u registar pokreće se prijavom za upis, koju podnosi Odjeljenju ovlašćeno lice omladinske organizacije.
- (2) Uz prijavu za upis u registar prilažu se:
- a) osnivački akt;
 - b) statut;
 - c) spisak lica koja su ovlaštena za zastupanje;
 - d) lista osnivača;
 - e) programski ciljevi;
 - f) rješenje o upisu u sudski registar.
- (3) Omladinska organizacija briše se iz registra na osnovu konačnog rješenja o prestanku rada, zabrani rada, odluci o statusnim promjenama i slično.
- (4) Način vođenja registra, sadržaj obrazaca, isprave koje se prilažu i sadržaj prijave za upis utvrđuje Odjeljenje.

POGLAVLJE VI - INSTITUCIONALNO UČEŠĆE MLADIH U DONOŠENJU ODLUKA

Član 25.
(Učešće mladih u donošenju odluka)

U cilju poboljšanja uloge i statusa mladih u Distriktu, nadležni organi obezbjeđuju uslove za učešće mladih u raspravama, debatama i donošenju odluka, koje se odnose na mlade.

Član 26.

(Komisija za mlade)

(1) Komisiju za mlade pri Skupštini Brčko distrikta Bosne i Hercegovine imenuje Skupština, kao stalnu komisiju.

(2) Sastav i nadležnosti Komisije za mlade utvrđuju se Poslovníkom o radu Skupštine Brčko distrikta Bosne i Hercegovine.

Član 27.

(Službenik za mlade)

Službenik za mlade je državni službenik u organima javne uprave koji se bavi pitanjima mladih.

Član 28.

(Dužnosti službenika za mlade)

(1) Službenik za mlade usklađuje podršku mladima sa višim nivoima vlasti u Brčko distriktu BiH i vrši koordinaciju sa drugim institucijama javne uprave i javnim organima vlasti koji u svojoj nadležnosti imaju neku od oblasti definisane u Strategiji za mlade.

(2) Službenik za mlade:

- a) prati pružanje podrške mladima koja dolazi iz nevladinog sektora, njen kvalitet, njenu samostalnost u određivanju ciljeva i izvršavanju njenih zadataka, kao i u formiranju organizacione strukture;
- b) vodi spisak svih udruženja, institucija, ustanova, međunarodnih i drugih organizacija koje rade sa mladima ili pružaju podršku omladinskim aktivnostima;
- c) koordinira aktivnosti u vezi sa radom sa mladima i omladinskim aktivnostima;
- d) prati negativne uticaje na mlade bilo koje institucije, udruženja ili organizacije, uključujući i međunarodne organizacije, koje su u suprotnosti sa Ustavom i zakonom i predlaže poduzimanje zakonskih mjera koje provode nadležni organi;
- e) savjetuje mlade i njihove predstavnike, naročito o pravnim postupcima ostvarivanja prava i izvršavanja obaveza zasnovanih na ovom i drugim zakonima;
- f) vodi registar omladinskih organizacija;
- g) unapređuje lični profesionalni razvoj i usavršavanje;
- h) prati jačanje kapaciteta svih onih koji se bave radom sa mladima i omladinskim aktivnostima.

POGLAVLJE VII – VIJEĆE MLADIH BRČKO DISTRIKTA BiH

Član 29.

(Vijeće mladih)

(1) Vijeće mladih označava udruženje mladih, zasnovano na dobrovoljnom članstvu omladinskih organizacija, koje predstavlja interese mladih i omladinskih organizacija.

(2) Sva pitanja od značaja za rad Vijeća mladih bliže se uređuju statutom koji donosi njegova skupština.

(3) Vijeće mladih donosi poslovnik o radu.

Član 30.
(Osnivanje i članstvo)

- (1) Osnivanje i registracija Vijeća mladih se vrši u skladu sa Zakonom o udruženjima.
- (2) Omladinska organizacija može biti član Vijeća mladih ako je upisana u registar iz člana 23. ovog zakona.
- (3) Vijeće mladih osniva više od 50% (pedesetposto) omladinskih organizacija iz člana 8. ovog zakona.
- (4) Omladinske organizacije mogu osnovati samo jedno Vijeće mladih na teritoriji Distrikta.

Član 31.
(Dužnosti Vijeća mladih)

Vijeće mladih dužno je učestvovati u :

- a) planiranju, razvoju i primjeni Strategije za mlade i programa djelovanja za mlade;
- b) zastupanju interesa i prava omladine i njihovom institucionalnom učešću u životu i radu Distrikta;
- c) animiranju mladih za omladinski rad;
- d) informisanosti mladih;
- e) koordinaciji i realizaciji omladinskih projekata;
- f) koordinaciji sa nadležnim organima i organizacijama u Distriktu;
- g) međunarodnoj omladinskoj saradnji i dr.

Član 32.
(Informisanje)

- (1) Vijeće mladih, utvrđuje program i oblik informisanja mladih u Distriktu.
- (2) Program informisanja mladih obezbjeđuje nesmetan tok informacija putem različitih medija koje su od značaja za unapređenje omladinske politike u Distriktu, razvoj omladinske saradnje i jačanja omladinskog sektora.

POGLAVLJE VIII - OMLADINSKE MANIFESTACIJE, MEĐUNARODNA OMLADINSKA SARADNJA I NADZOR

Član 33.
(Oblici omladinskih manifestacija)

Oblici omladinskih manifestacija su: omladinski kampovi, kulturno-umjetničke priredbe, sportska takmičenja i slično.

Član 34.
(Organizovanje)

Organizovanjem omladinskih manifestacija bave se omladinske organizacije i druga fizička i pravna lica.

Član 35.
(Međunarodna omladinska saradnja)

(1) Međunarodna omladinska saradnja predstavlja različite oblike saradnje sa mladima na međunarodnom nivou.

(2) Međunarodna omladinska saradnja obuhvata: učešće omladinskih organizacija u radu međunarodnih institucija i organizacija, stručno usavršavanje u inostranstvu iz oblasti omladinskog rada, studentske posjete, učešće na konferencijama međunarodnog karaktera, saradnja sa međunarodnim institucijama i organizacijama, razmjena volontera i drugi oblici saradnje.

Član 36.
(Nadzor)

Nadzor nad primjenom ovog zakona, kao i zakonitošću rada omladinskih organizacija vrši Odjeljenje.

POGLAVLJE IX - KAZNE NE ODREDBE

Član 37.
(Novčane kazne za pravne osobe)

- (1) Novčanom kaznom od 1.000 KM do 15.000 KM, kaznit će se za prekršaj pravna osoba ako u radu sa mladima postupa suprotno članu 6. ovog zakona;
- (2) Za prekršaje iz stava (1) ovog člana kaznit će se i odgovorna osoba u pravnoj osobi novčanom kaznom u iznosu od 300 KM do 3.000 KM.
- (3) Za prekršaje iz stava (1) ovog zakona kaznit će se i fizička osoba novčanom kaznom u iznosu od 100 KM do 1.000 KM.

Član 38.
(Novčane kazne za omladinske organizacije)

Novčanom kaznom od 300 KM do 3.000 KM kaznit će se za prekršaj omladinska organizacija:

- a) kada obavlja djelatnosti koje nisu saglasne načelima i ciljevima utvrđenim svojim statutom (član 11. stav (1) ovog zakona).
- b) ako se bavi aktivnostima usmjerenim na podrivanje ustavnog poretka, raspirivanje nacionalna, rasne, vjerske i polne diskriminacije (član 11. stav (2) ovog zakona).
- c) ako se uključi ili angažuje u predizbornoj kampanji političkih partija i neovisnih kandidata, ili im pruža podršku (član 11. stav (3) ovog zakona).

DIO TREĆI - PRELAZNE I ZAVRŠNE ODREDBE

Član 39.
(Rokovi)

- (1) Vlada je dužna utvrditi program rada za realizaciju Strategije za mlade, u roku od 60 dana od dana stupanja na snagu ovog zakona.
- (2) Šef Odjeljenja je dužan donijeti odluku iz člana 23. ovog zakona, u roku od 30 dana od dana stupanja na snagu ovog zakona.

Član 40.
(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku Brčko Distrikta BiH“

Broj.....
Datum

Predsjednik Skupštine
Brčko Distrikta Bosne i Hercegovine

OBRAZLOŽENJE

1. STATUTARNO- PRAVNI I ZAKONSKI OSNOV ZA DONOŠENJE ZAKONA

Statutarno-pravni osnov za donošenje Zakona o mladima Brčko distrikta Bosne i Hercegovine je član 22. Statuta Brčko distrikta BiH– prečišćeni tekst („Službeni glasnik Brčko distrikta BiH“ broj: 2/10).

2. RAZLOZI ZA DONOŠENJE ZAKONA

Razlozi za donošenje Nacrta Zakona:

a) analiza sadašnjeg stanja

Ne postoji Zakon o mladima Brčko distrikta BiH, niti neki drugi zakon koji uređuje ovu oblast, kao ni Zakon o mladima BiH, ali u oba entiteta su usvojeni zakoni i to Zakon o mladim FBiH i Zakon o omladinskom organizovanju u RS.

b) problemi koje treba da riješi

Mladi u Brčko distriktu BiH čine oko 19% (devetnaestposto) stanovništva. Podaci agencije za statistiku BiH govore da je prirodni priraštaj u Distriktu od 2,25% (dvazarezdvadesetpetposto) u 2006. godini postepeno opadao i dostigao zabrinjavajućih 0,13% (nulazareztrinaestposto) u 2010. godini. Ovi podaci su jako nepovoljni za Distrikt, ako se pogledaju uporedni pokazatelji, koji ukazuju na to da se od situacije u kojoj je Distrikt prednjačio, došlo do toga da su mladi u Distriktu, u značajnom procentu, više neaktivni i nezaposleni nego mladi u entitetima. I pored prisutnih problema, mladi u Distriktu organizovani su u 17 omladinskih organizacija i predstavljaju jači dio civilnog sektora Distrikta, realizirali su veliki broj projekata finansiranih od strane Vlade Brčko distrikta BiH, ali i projekte podržane od strane drugih donatora. Postoji infrastruktura namjenjena boljem položaju mladih, besplatan prevoz u škole, sportske dvorane i tereni na otvorenom, financiranje projekata omladinskih organizacija, mreža omladinskih klubova u 26 mjesnih zajednica u prigradskom i seoskom dijelu Distrikta, veliki broj sportstkih klubova i omladinskih organizacija koji okupljaju mlade, Omladinski centar Brčko distrikta BiH, ali je potrebna i zakonska regulativa za određene oblasti i djelovanje omladinskih organizacija.

c) ciljevi koji se postižu

Zakonom o mladima Brčko distrikta BiH uredila bi se osnovna pitanja vezana za ovu populaciju kao što su: prava i obveze mladih, omladinsko organiziranje, strategije/politike za mlade, briga za mlade, institucionalno učešće mladih u donošenju odluka i druga pitanja od interesa za život, položaj i djelovanje mladih ljudi u Brčko distriktu BiH.

d) razmatranje mogućnosti da se problem riješi i bez donošenja zakona

Za razliku od entiteta, tijela Distrikta, još uvijek nisu usvojila ni jedan planski ili zakonski akt koji bi se konkretno bavio pitanjima mladih. Potreba za donošenjem zakona je evidentna, a politika koja se odnosi na dio populacije mladih, određena je isključivo starosnom dobi, kao

jedinim kriterijem. Nadležnost za utvrđivanje politika i instrumenti za njihovu realizaciju, za razliku od Brčko distrikta BiH, entiteti su uredili posebnim zakonskim propisima, kojima se ova oblast pokušava u određenoj mjeri institucionalizirati i postaviti kao obavezan smjer djelovanja nadležnih tijela.

e) donošenje zakona je najbolji način za rješavanje problema

Donošenje Zakona o mladima Brčko distrikta BiH jedina je mogućnost da se na zakonit i pravičan način urede pitanja od interesa za život, položaj i djelovanje mladih ljudi u Brčko distriktu BiH.

f) vjerovatnoća budžetskih prihoda od uvođenja zakona

Primjena Zakona o mladima Brčko distrikta BiH, u predloženom tekstu, ne zahtijeva dodatna budžetska sredstva, odnosno neće izazvati negativne finansijske efekte po tekući budžet Brčko distrikta BiH, u kojoj se planira završiti procedura usvajanja Zakona.

3. USKLAĐENOST ZAKONA SA ACQUIS EU

Na osnovu Obavještenja Zakonodavnog ureda broj predmeta: 05-01.3-001289/10, broj akta: 01.5-0377MB-28/15, od 13.10.2015.godine, a sa ciljem usklađivanja zakonodavstva Brčko distrikta Bosne i Hercegovine sa *acquis-em* EU, za ovaj zakon ne postoje obavezujući propisi EU sa kojima je potrebno uskladiti nacrt zakona s obzirom da ne uređuje materiju koja je regulisana propisima EU.

4. OBJAŠNJENJE OSNOVNIH PRAVNIH INSTITUTA I POJEDINAČNIH RJEŠENJA

– DIO PRVI - OPŠTE ODREDBE

– POGLAVLJE I – PREDMET, JEZIK I PISMO

- u članu 1. zakona definirano je šta se propisuje ovim zakonom ;
- u članu 2. zakona se propisuju definicije, odnosno značenje pojedinih izraza upotrebljenih u ovom zakonu;
- član 3. propisuje cilj zakona.

– DIO DRUGI- GLAVNI DIO

– POGLAVLJE I – OMLADINSKO ORGANIZOVANJE

- Članovi 4. i 5. zakona propisuju omladinsko organizovanje i ciljeve omladinskog organizovanja;

– POGLAVLJE II – PRAVA I OBAVEZE MLADIH

- Član 6. i 7. Zakona propisuje prava i obaveze mladih

– POGLAVLJE III – OMLADINSKE ORGANIZACIJE

- Član 8., 9.,10.,11.,12.,13., 14. i 15. zakona propisuju pitanja koja se odnose na omladinske organizacije, udruživanje, javnost rada, samostalnost u radu, obezbjeđenje sigurnosti i zaštite prava i sloboda, prava i obaveze omladinskih organizacija i njihovo ostvarivanje.

– **POGLAVLJE IV – POLITIKA PREMA MLADIMA I STRATEGIJA ZA MLADE**

- Član 16., 17. i 18., zakona propisuju politiku prema mladima, brigu o mladima, donošenje Strategije za mlade sa programskim pristupom djelovanja prema mladima što uključuje definisane probleme i potrebe mladih, strateške pravce djelovanja, ciljeve strategije i mjere za realizaciju ciljeva Strategije.

– **POGLAVLJE V – PROGRAMI DJELOVANJA ZA MLADE**

- Član 19., 20., 21., 22., 23 i 24. zakona propisuju realizaciju Strategije kroz Programe djelovanja za mlade koji se donose svake godine, određuje se šta se definiše Programom djelovanja za mlade, oblasti za izradu programa, nadležnost Odjeljenja za stručne i administrativne poslove i saradnja sa nadležnim odjeljenjima i institucijama u skladu sa Programom djelovanja za mlade, obaveze vođenja Registra omladinskih organizacija i donošenje Odluke o kriterijumima za upis u registar, kao i postupak za upis i brisanje iz Registra.

- **POGLAVLJE VI – INSTITUCIONALNO UČEŠĆE MLADIH U DONOŠENJU ODLUKA**

- Član 25., 26., 27. i 28. zakona propisuju obavezu nadležnih organa da obezbijede učešće mladih u donošenju odluka, učešće na raspravama i debatama koje se odnose na problematiku mladih, formiranje stalne komisije za mlade, koju imenuje Skupština Brčko distrikta BiH i nadležnost komisije za mlade i dužnosti službenika za mlade.

- **POGLAVLJE VII – VIJEĆE MLADIH BRČKO DISTRIKTA BIH**

- Član 29., 30., 31. i 32. zakona propisuju osnivanje Vijeća mladih kao krovno udruženje mladih zasnovano na dobrovoljnom članstvu omladinskih udruženja, a koje predstavlja interese mladih i omladinskih organizacija, dužnosti Vijeća mladih i program informisanja mladih.

- **POGLAVLJE VIII – OMLADINSKE MANIFESTACIJE, MEĐUNARODNA OMLADINSKA SARADNJA I NADZOR**

- Član 33., 34., 35. i 36. zakona propisuje oblike omladinskih manifestacija kao što su kampovi, savjetovanja, kulturno-umjetničke priredbe, sportska takmičenja, zatim organizovanje omladinskih manifestacija, međunarodnu omladinsku saradnju i nadzor nad primjenom zakona.

- **POGLAVLJE IX – KAZNENE ODREDBE**

- Član 37. i 38. zakona propisuje novčane kazne za prekršaje pravnih osoba i omladinskih organizacija.

– **DIO TREĆI - PRIJELAZNE I ZAVRŠNE ODREDBE**

- Član 39. Zakona propisuje rokove za utvrđivanje programa rada za realizaciju Strategije za mlade i donošenje Odluke o kriterijumima za upis u registar.
- Član 40. zakona propisuje da ovaj zakon stupa na snagu osmog dana od dana objavljivanja u „Službenom glasniku Brčko distrikta Bosne i Hercegovine“.

5. ANALIZA EFEKATA ZAKONA

Zbog velikog interesa, kao i velikog broja omladinskih organizacija, stvorila se potreba za pravnom regulativom koja bi na najbolji način definisala prava i obaveze mladih, omladinsko organizovanje, brigu za mlade, institucionalno učešće mladih u donošenju odluka i druga pitanja od interesa za život, položaj i djelovanje mladih u Brčko distriktu BiH.

6. PROVEDBENI MEHANIZMI I NAČINI OSIGURAVANJA POŠTOVANJA ZAKONA

Provedbeni mehanizmi za osiguranje provođenja zakona su propisani tako da nadzor nad primjenom zakona provodi Odjel za stručne i administrativne poslove, a propisane su i kaznene odredbe za prekršaje pravnih osoba i omladinskih organizacija.

7. PROCJENA FINANSIJSKIH SREDSTAVA POTREBNIH ZA PROVOĐENJE ZAKONA

Aktom Direkcije za financije Brčko distrikta BiH, broj: 02-04.1-765/15 od 06.10.2015.godine, utvrđeno je da za provođenje ovog propisa neće biti potrebna dodatna finansijska sredstva u tekućoj budžetskoj godini.

8. OPŠTI INTERES ZBOG KOJEG SE PREDLAŽE POVRATNO DJELOVANJE, AKO PRIJEDLOG ZAKONA SADRŽI ODREDBE SA POVRATNIM DJELOVANJEM

Ne predlaže se povratno djelovanje ovog propisa.

9. RAZLOGE ZA DONOŠENJE ZAKONA PO HITNOM POSTUPKU, AKO JE ZA DONOŠENJE ZAKONA PREDLOŽEN HITNI POSTUPAK

Ne predlaže se donošenje ovog propisa po hitnom postupku.

10. RAZLOGE ZBOG KOJIH SE PREDLAŽE DA ZAKON STUPI NA SNAGU PRIJE OSMOG DANA OD DANA OBJAVLJIVANJA U SLUŽBENOM GLASNIKU BRČKO DISTRIKTA BiH

Ne predlaže se da propis stupi osam dana prije objavljivanja u Službenom glasniku Brčko distrikta BiH.

11. KONSULTACIJE MEĐU INSTITUCIJAMA

Radna grupa za izradu ovog zakona je nakon izrade prednacrt, isti prosljedila organima javne uprave i institucijama Brčko distrikta Bosne i Hercegovine, kao i omladinskim organizacijama na komentare, od kojih je dobila određene sugestije i prijedloge.

Primjedbe i prijedlozi:

Odjeljenje za komunalne poslove, Odjeljenje za poljoprivredu, šumarstvo i vodoprivredu, Odjeljenje za javnu sigurnost i Odjeljenje za javni registar nisu imali primjedbe na dostavljeni tekst Zakona

Odjeljenje za raseljena lica, izbjeglice i stambena pitanja imali su kometar na član 2., član 9., član 24., član 26., član 28., član 32., i član 33. Od navedenih komentara prihvaćeni su oni koji se odnose na član 24. i član 26. i član 33 u kojem je dodat jedan stav.

Primjedbe Odjeljenja za obrazovanje, na član 7. teksta Zakona, su prihvaćene. Primjedbe Policije Brčko distrikta BiH nisu prihvaćene.

Zakonodavna kancelarija, aktom broj: 05-01.3-001289/10 od 08.12.2014.godine, dala je primjedbe da postoje nedostaci materijalne i nomotehničke prirode, kao i da se komentari odnose ne samo na nomotehniku, nego i na materijalni dio. Sve primjedbe i komentari Zakonodavne kancelarije su prihvaćeni i ugrađeni u tekst nacrt Zakona. Takođe, na radnom sastanku dana 12.11.2015. godine, date su dodatne primjedbe na tekst Nacrta zakona o mladima, koji je nakon istog usaglašen.

Razlozi neprihvatanja primjedbi i prijedloga:

Radna grupa primjedbe Policije Brčko distrikta BiH nije prihvatila iz razloga što iste nisu ocijenjenje kao pozitivne na sadržaj propisa.

Pravobranilaštvo Brčko distrikta Bosne i Hercegovine dostavilo je Mišljenje broj: M-765/15 od 21.10.2015.godine, kojim je data saglasnost na nacrt zakona da se prosljedi u daljnju proceduru.

Aktom broj: 05-01.3-001289/10 od 23.11.2015.godine, Zakonodavna Kancelarija je dala mišljenje da se nacrt Zakona može procesuirati na daljni postupak, nakon otklanjanja nomotehničkih neodstataka.